

佛說十一想思念如來經

宋三藏求那跋陀羅譯

聞如是一時婆伽婆在羅閱城耆闍崛山中
與大比丘衆千二百五十人俱爾時世尊告
諸比丘當以十一想思念如來已思念當發
慈心於如來所云何爲十一戒意清淨一威
儀具足二諸根不錯三信意不亂四常有勇
猛意五若更苦樂不以爲憂六意不妄失七
止觀現在前八三昧意無休息九智慧意無
量十觀佛無厭足十一如是比丘當以此十一
想思念如來已思念如來當發慈心於如來
所是謂比丘於比丘中修行念佛彼比丘已
修行念佛於二果當求一果於現法中得自
在成無餘阿那含爾時諸比丘聞佛所說歡
喜奉行

聞如是一時婆伽婆在舍衛城祇樹給孤獨
園是時世尊告諸比丘若慈心解脫親近廣
布修行以辦獲便起善具足便當有十一報
十一果云何爲十一卧安覺安不見惡夢天
護人愛非人所敬不毒不兵水火不喪亦不
加刑身壞命終生善處梵天上於諸善法速
得捷疾能盡有漏行比丘慈心解脫親近廣
布修行以辦以獲便起善具足當有此十一
法是故諸比丘當求方便慈心解脫如是諸
比丘當作是學爾時諸比丘聞佛所說歡喜
奉行

佛說十一想思念如來經